







G H







ADVERTISSEMENT  
A LA FRANCE  
TOUCHANT LES  
LIBELLES QV'ON SEME  
CONTRE LE GOVERNE-  
ment del'Estat.

---

M. DC. XV.

ALVA BRADY

THE NEW YORK  
LIBRARY

EMERSON

CASE

F

39

.326

1615 ad v, 2

W. D. C. M.

---

# ADVERTISSEMENT

*à la France touchant les libelles  
qu'on seme contre le Gouvernement  
de l'Estat.*

---

**Q**VAND ie considere par  
quels moyens miraculeux  
ceste grande & puissante  
Monarchie s'est plusieurs  
fois maintenüe contre les  
tempestes & les orages qui  
se sont esleuez pour la renuerfer; il faut  
que i'aduouë que Dieu, protecteur des  
iustes Empires, à quelque soing particu-  
lier de nostre conseruation: Et certes,  
comme il est impossible de ne le voir  
point sans estre extremement aueuglez,  
aussi ne le pouuons-nous meconnoistre  
sans nous monstrier infiniment ingrats.  
Quelques coniurations qu'on ayt faictes  
autresfois pour destruire ce Royaume:  
quelques artifices qu'on ayt pratiquez  
pour degouster les peuples del'obeyssan-  
ce qu'ils doiuent naturellement à leurs

Roy, & quelques ennemis estrangers ou domestiques qui l'ayent assailly, on l'a bien pû voir esbranlé, mais on ne le vit iamais abatu: Au contraire, comme Antée reprenoit de nouvelles forces aussi tost qu'il touchoit la terre; il semble pareillement que cét Estat reprenne vne nouvelle vigueur au mesme temps qu'il paroist entierement ruiné.

Mais si on a veu reluire quelquesfois des tesmoignages extraordinaires de la faueur du Tout-puissant, ie puis dire avecques raison que ç'a esté depuis l'aduènement du Roy à la Courōne iusques à present: Car de quelle heureuse & profonde paix auons nous iouy malgré les efforts de deux ou trois factieux qui ne cherchent leurs felicitéz particulieres que dans les miseres publiques, & qui pensent estre oysifs lors qu'ils ne conseillent rien contre le seruice du Roy? La Religion qui met les Sceptres en la main des Roys, qui les assiet sur les Throsnes, qui pose les Couronnes sur leurs testes, qui les oingt solemnellement, qui rend leur pouuoir & leurs personnes inuiolables; La Religion dis ie, qui affermit leur autorité sur des fondemens vrayement diuins, n'estant contee par ces hommes.



là qu'au rang des choses humaines, se faut  
il esmerueiller si du mespris de Dieu ils  
sont venus au mespris des Roys ? Mais  
quoy qu'ils s'efforcent encor maintenant  
de nous precipiter dans les abismes des  
mesmes miseres dont le bras victorieux  
de Henry le Grand nous a miraculeuse-  
ment deliurez ; quoy que ces prodiges  
de nature facent tout ce qu'il leur est pos-  
sible pour semer la diuision entre nous a-  
fin de s'agrandir de nostre ruine, si leurs  
factions nous font craindre quelques si-  
nistres malheurs, n'auons nous pas occa-  
sion d'esperer de grandes felicitez, quand  
nous iettons les yeux sur vn ieune Roy,  
dont la vertu assistée des sages conseils  
de la Reyne sa mere, promet non seu-  
lement de restablir le Royaume en sa  
premiere splendeur, mais de le rendre aus-  
si plus heureux & plus fleurissant qu'il ne  
fut iamais.

Il ny a sorte de moyens quen'ayent re-  
cherchez ces perturbateurs du repos pu-  
blic : Il n'y a ressorts qu'ils n'ayent essayé  
de faire iouer, ny artifice qu'ils n'ayent  
employé pour faire reüssir leurs desseins  
pernicieux. La plus facile voye qu'ils  
se soient imaginee pour y paruenir, ça

esté de décrier l'administration des affaires par des libelles diffamatoires qui contiennent autant de crimes capitaux que de parolles, & dont les Autheurs, gens execrables & maudits, ne meritent pas moins que le feu. Voylà la meschanceté dont ils se seruēt pour alterer les volontez des peuples en descricant le gouuernement de l'Estat, & en faisant accroire aux simples que les affaires sont reduictes à l'extremité; comme si quand ces escripts seroient aussi veritables qu'ils sont calomnieux, c'estoit vn subiect legitime de secouer le ioug de l'obeyssance que nous deuons à nostre Roy, auquel Dieu a donné le pouuoir de nous commander, comme il nous a commandé de luy obeïr; C'est le pretexte ordinaire de ceux qui troublent les Estats: C'est par ces trompeuses amorces qu'on prend les foibles esprits: C'est en ces occasions que les gens de bien sont esprouuez & que les meschans sont recongneuz: iamais on ne vit regne tant fut-il heureux qu'il n'y eust tousiours des personnes qui ne pouuoient supporter l'Estat des affaires presentes; c'est vn vice attaché à nostre nature & non pas aux siecles. Iamais les hommes ne

sont satisfaits de leur fortune quelque  
 grande qu'elle soit : Nous nous imaginōs  
 tousiours les siècles passez plus innocents  
 que l'aage ou nous viuons; & neantmoins  
 nos peres ont accusé les temps que nous  
 estimons auoir esté les plus heureux, &  
 l'aage ou nous sommes que nous appel-  
 lons iniustemēt l'aage de fer, sera quelque  
 iour nommē l'aage d'or par la posterité. Il  
 ne faut point doubter qu'il n'y ayt eu des  
 mal-contents souz le regne d'Auguste &  
 de Trajan; sous celuy de Charlemagne &  
 de S. Louys; il y en aura tant que le mon-  
 de sera monde. C'est pourquoy on ne se  
 doit point estonner des plainctes iniu-  
 stes qu'on fait du gouuernement de l'E-  
 stat. Chacun sçait en quelle perplexité la  
 France fut reduicte apres la mort tragique  
 & lamentable de Henry le Grand; il sem-  
 bloit que toutes nos ioyes & toutes nos  
 prosperitez fussent terminées avecques  
 sa vie, nous n'auions autres obiects de-  
 uant nos yeux que guerres, que batailles,  
 que sieges & saccagemens de villes, que  
 meurtres, que violemens, bref, que  
 choses funestes a la veuë & à la pensee;  
 il ny auoit insolence que les meschants  
 n'esperassent de commettre impunemēt,



ny sorte d'outrages que les gens de bien ne craignissent ; toutefois la singuliere prudence de la Reyne a si dignement pourueu à tout ce qui estoit de nostre biē quelle à conuertiy toutes nos craintes en esperances tous nos pleurs en larmes de ioye, & toutes nos douleurs en contentements. De telle sorte, que nous auons esté guarantis non seulement de tous les malheurs presque fataux à la France durant la minorité de nos Roys; mais auons mesmes esté comblez de toutes les felicitez qu'un Estat peut receuoir sous la domination d'un Roy non moins iuste qu'absolu: Le repos que Henry le Grand nous auoit acquis par sa valeur victorieuse, la Reyne l'a conserué par sa conduite admirable, avec des succez si conformes à nos desirs, que nostre condition n'a point esté autre sous sa Regence, qu'elle estoit sous le regne du feu Roy; ou s'il y à eu quelque difference, cest en ce que nous auons esté plus heureux depuis cinq ans que nous n'estions auparauant; chose que ie puis dire avec aussi peu de flaterie que ie suis esloigné de la necessité de flatter; & toute la France m'en seruira de tesmoing : Car si l'on prend la peine de  
regarder



regarder exactement de quelle façon le peuple a esté traicté depuis ce temps-là, ie m'asseure qu'il ne se trouuera personne qui ne confesse que nous debuons la tranquillité de ce Royaume à ceste Princesse incomparable, & tout le bon-heur de nostre siecle à la pieté de ses mœurs.

La France est composee de trois ordres sous lesquels sont reduites toutes les conditions des subiects du Roy, excepté celles des Princes. De quelles nouuelles impositions à ton chargé les Ecclesiastiques depuis la mort de Henry le Grand, qu'ils aient eu subiect de se mescontenter de la Reyne? ne les a-telle pas cheries comme bons seruiteurs du Roy; & honoré mesmes, comme Pasteurs du peuple, & comme Ministres de Dieu? s'est-il passé quelque occasion ou ils n'aient esté fauorablement traictéz? Quant à la Noblesse, outre quelle a esté maintenuë par le Roy en tous les priuileges, honneurs, & immunitéz qui luy ont esté concedes par les feux Roys ses predecesseurs; la Maiesté ne s'est point contentee de l'esleuer aux principales charges du Royaume, mais la mesme gratiffiee d'une si grande quantité de pensions & d'appointements, qu'il

semble qu'à l'exemple d'Alexandre, elle nese soit voulu reseruer que l'esperance, & que comme ce genereux Romain qui refusa les presents des Samnites, elle ait mieuxaymé commander aux riches que de posséder leurs richesses. L'affectiō naturelle qu'elle porte a sa Noblesse n'estoit pas bornee de ces seules liberalitez: son dessein estoit d'oster la venalité des offices afin que les Gentils-hommes püssent paruenir par leur merite seul & par la grace du Princeaux dignitez des Magistratures: Voyla par quelle reformation le Roy desiroit rendre remarquable la premiere annee de sa maiorité: mais les remonstrances de tous les Officiers ont esté cause de faire sursoir l'execution d'un proiect si glorieux.

Quant au tiers estat, veu que dez le commencement de la Regēce de la Reyne, il fut soulagé de quatorze cens mille liures paran en vn seul article & sur le seul impost du sel, & deschargé en outre d'un nombre infiny de Commissions & de reuocations d'Offices dont il estoit auparavant extremement trauaillé, qui est-ce qui pourra dire, sinon avec vn extreme tort, que cet Ordre non plus que les au-

tres ait eu subiect de se mécontenter? Vne  
des plus grādes plaintes que l'on face, est  
del'administration des finances; mais ie  
puis dire qu'il y a long-temps qu'elles ne  
furent plus innocemment gouuernées  
que maintenant; aussi ne croy-je pas qu'il  
y ait persōne qui en veuille accuſer celuy  
qui en a le principal maniemēt, s'estant  
tousiours comporte en ceste charge  
auec vnetelle integrité, qu'il faict voir à  
tout le monde combien le deuoir de la  
conscience est plus puissant sur les gens  
de bien que toutes les richesses de la ter-  
re. Je me contenteray doncques de dire  
que la saison que nous auōs passée ne per-  
mettoit pas qu'on en vſast autrement.  
Nous nous sommes veus en vn tēps me-  
nassé de tāt d'orages, que cōme ceux qui  
se treuuent en la mer durant quelque grā-  
de tourmente, sont quelques fois forcez  
de ietter leurs richesses au fonds de l'eau,  
afin de sauuer le Nauire; de mesmes ceux  
qui tenoient le timon de cet Estat, le  
voyants au danger d'estre perdu par les  
tempestes qui s'esleuent le plus souuent  
durant le basaage de nos Roys, ont esté  
contraints de faire des largesses extraor-  
dinaires pour euitier le naufrage de ce



grand vaisseau dans lequel les fortunes & les vies de tant de peuples sont enfermées. Voila qu'elle a esté la cause de ceste depente: Presque toute la Noblesse estoit tellement incommodée qu'il ne luy restoit plus que la vie quelle püst employer pour le seruice de son Prince: N'estoit-il pas donc raisonnable que le Roy la mist en tel estat qu'il en peust tirer du seruice & que ses ennemis en receussent de l'estonnement? Je ne doute point que cela ne semble repugner à la dignité d'un grand Monarque, d'achepter la paix de ses subiects: mais comme Alexandre osta le Diademe de sa teste pour bander & étancher la playe d'un ieune seigneur qu'il cherissoit extremement: tout de mesme les Roys qui veulent sauuer leurs Estats, sont quelquesfois contraincts de déposer leurs Courōnes par maniere de dire & de quicter ce qui est de leur autorité pour empescher les grandes effusions de sang qu'apportent les guerres estrangeres & ciuilles. Dōc à quel vsage plus necessaire pouuoit-on employer vne partie de l'argent que le feu Roy auoit laissé, qu'à la conseruation de la paix, attendu que c'est par la paix que les Roys regnent souuerai-



nement sur leurs peuples & que les peuples vivent heureusement sous leurs Roys ? attendu que c'est par la paix que les vertus sont en leur throne, les loix en vigueur, les Magistrats en autorité, le commerce libre par la terre & par la mer, l'innocence asseuree, la malice punie, la vertu recongneüe, les arts en leur lustre, les Villes en leur ornement, & les Monarchies en leur grandeur ? Combien sont plus pretieux les thresors des cœurs que des richesses ? Il n'y a point de difficulté qu'il ne soit tres-necessaire de retrancher vne grande partie des pensions, mais il y a d'autres choses qu'il faut faire auparavant. On nous menasse de s'opposer à la perfection du Mariage du Roy, de laquelle despend la paix du Royaume : il faut rompre les obstacles des plus importantes affaires auant que de pouruoir à celles qui sont de moindre consequence, & imiter les bons medecins qui guerissent les maladies les plus dangereuses, auparavant que de remedier à celles qui sont sans peril. Je sçay tres bien que plusieurs qui ne desirent que de voir la France dedans les mesmes calamitez ou elle estoit il n'y a pas long-téps, fortiffiēt leur audace de l'espe-

râce qu'ils ont de voir le Parlemēt porté à  
 quelque desordre extraordinaire: mais  
 surquoy se fondent ils pour auoir si mau-  
 uaise opiniō d'une Cōpagnie en laquelle  
 on retrouueroit l'obeissance, quand elle  
 seroit morte en toutes les autres Cours  
 Souueraines? Nous auons veu comme  
 les subiects du Roy ont esté traictez;  
 voyons comme les Aliez ont esté entre-  
 tenus; car encore que la Royauté consiste  
 au pouuoir legitime que le Prince a sur  
 son peuple, neantmoins d'autāt que leurs  
 Estats sont subiects tant aux guerres estrā-  
 geres que ciuilles, il est besoing qu'ils fa-  
 cent des Alliances avecques les autres  
 Roys, Seigneuries & Potentats afin de les  
 rendre leurs amis ou d'empescher qu'ils  
 ne soient leurs ennemis; c'est la raison  
 pour laquelle les confederations sont si  
 necessaires à tous Estats quelques grands  
 qu'ils soient, que pour en nier l'vtilité, il  
 faut auoir perdu tout iugement. Cela e-  
 stant posé comme vn fondement certain,  
 par quel moyen la Reyne laquelle en tous  
 ses desseings ne s'est proposée pour but  
 quel'honneur de Dieu, & le bien general  
 du Royaume, pouuoit elle mieux empes-  
 cher les troubles qui s'esleuent ordinaire-

ment en vne saison semblable à celle que nous auons passée, qu'en entretenant non seulement les anciennes Alliances de la Couronne, mais en obligeant aussi le Roy d'Espagne à tous les intersts de la France par les mariages du Roy avecques l'Infante, & de Madame avecques le Prince d'Espagne ? n'estoit-ce pas le seul moyen de retenir en leur deuoir par la terreur de ces deux puissances vnies, ceux à qui le mépris de la jeunesse du Prince pouuoit donner la hardiesse de troubler le repos publicq, ceux di-je qui dans leurs lettres publiées depuis trois iours parlent ouuertement des desseins du Roy, non comme subiects obeissants, mais cōme ennemis declarez ? Pouuoit-on avecques plus de prudēce empescher les entreprises tragiques de ces Hydres de rebelliō, de ces flābeaux des guerres ciuiles, de ces hōmes detestables & pernicioeux qui ne nous troubleroient point maintenant & ne seroient point si temeraires, si le feu Roy n'auoit point esté si clement ?

Henry le Grand, Prince d'éternelle memoire, excusez moy si ie fais ceste reproche à vostre excessiue bonté, & pardonnez a la iuste douleur que ie ressēts de voir



l'autorité du Roy vostre cher fils & nostre souuerain Seigneur, trauesée par ceux que toutes sortes de deuoirs humains & diuins obligent plus estroitement a la conseruer: Pardonnez moy si ie me plains de vostre douceur & si ie deteste l'execrable impiete de ceux dōt l'ingratitude est si odieuse a tous les gens de bien qu'elle merite que la Iustice diuine élance la foudre pour les écraser; que les abismes de la terre s'ouurent pour les engloutir, & que toutes les puissances du monde s'arment pour les exterminer comme les pestes du genre humain.

Nos peres, ont veu des choses, bien estranges durāt leurs iours; mais virēt ils iamais riē de si prodigieux que ce que nous voyōs en nostre siecle? ô merueilleux chāgement de la volonté des hommes, qu'il faille que ceste Monarchie sous la quelle nous viuons si tranquillement & si heureusement, soit maintenant assaillie par ceux qui l'ont autrefois deffenduë. & que par vne mutation cōtraire elle soit maintenant deffenduë par ceux qui l'ont autrefois assaillie! Se faut-il doncq' émerveiller si les bons François se mettent en tel estat, qu'ils puissent reprimer l'audace de ceux  
qui



qui se veulent opposer a la volonté du Roy, & qui prennent pour specieux pretexte de leur reuolte, la fausse allarme qu'ils reçoient de voir les deux plus puissants Roys de l'Europe vnis ensemble par des mariages si prudemment deliberéz, si solemnellement promis, & si impatiemment attédus des gés de bien. Car tout ainsi que ceux de Lacedemone eurent raison d'entrer en deffiance des fortifications extraordinaires d'Athenes, se representans ce que pourroit faire ceste ville quād elle seroit rebastie, puis qu'elle entreprenoit de s'agrandir de la sorte estant ruinee? de mesme nous auons subiect de nous imaginer qu'elle seroit la hardiesse de ceux de la Religion pretenduës s'ils auoient vne grande puissance, puis que nous les voyons si fiers & si temeraires en vne si grande foiblesse. Il n'y a rien qu'ils ne demandent si on leur accorde vnefois, ie ne dy pas la rupture, mais la seule surseance de ces Mariages tāt necessaires à la paix de toute l'Europe. Il y a du peril & du deshonneur à leur octroyer ce qu'ils desirent; leur ambition n'a bornes quelconques; leurs passions n'ont iamais de mediocrité: leur humeur est tel-

le, que s'ils ne craignent eux mesmes ils se font craindre. Or si la principale fin des Mariages des Princes est l'vtilité de leurs peuples, nous ne pouuons pas tirer de ces Alliâces vn plus grand bien que la paix, qui est la mere de toute felicité. Aussi en receuons nous double fruiçt, en ce qu'elles nous guarantissent des guerres estrangeres & ciuilles, par ce qu'elles retiennent nos voisins dans le deuoir des confederations qu'ils ont avec la Courõne, & font demeurer les mauuais François dans les bornes de l'obeissance. Les factions du Royaume nous ont reduits à tel poinçt, que le bon-heur de cet Estat despèd du tout de la perfectiõ de ces Mariages. Ceux que l'honneur & la conscience ne peuuent retenir dans leur deuoir, la crainte qu'ils ont del'vnion de ces deux Couronnes les y retient. C'est le subiet pourquoy quand ie considere qu'il en procede tant de fruiçts si salutaires à la Religion, si euidents à nos yeux, & si desirables à tous les gens de bien, iem'estonne grandement de ce que l'on voit des hommes qui font profession d'estre Catholiques, & qui se disent amateurs de leur patrie & font neantmoins les mes-

mes desirs, & tiennent les mesmes discours que les aduersaires de la foy, & que les ennemis de la Monarchie & du repos de la France. Mauuais François que nous sommes, imprudens & dénaturez, plus barbares que ne sont les barbares mesmes, engeance sans pieté, sans amour, sans foy, sans conscience, sommes nous pas indignes d'auoir vn bon Roy, nous qui le voulons marier à nostre fantasie & le forcer en vne chose en laquelle seule on ne peut contraindre personne? ô malheureuse condition des Princes, si cela ne leur est pas permis qui est licite au moindre de leurs subiects! sommes nous pas bien ennemis de nostre salut, de rechercher nostre ruine? sommes nous pas bien rebelles de nous opposer à la volonté de nostre Roy? sommes nous pas bien iniustes de ressentir presentemēt par le repos ou nous viuons les effects merueilleux de ces Aliances, & d'en nier l'vtilité? Qu'est-ce que nous autres qui sommes éclairez de la cognoissance du vray Dieu, & qui nous vantons d'estre polis par les arts & par les disciplines pouuons plus reprocher à ces peuples qui habitent aux derniers bouts de la terre, & qui n'ont entre eux n'y poli-



ce ni religion ? peut-on pas dire iustement de nous ce qu'on a dict autresfois del'impieté des mœurs de la Grece, que l'ignorance des vices est plus vtile aux barbares que n'est à nous autres la cognoissances des vertus?

Tout ainsi donc que l'on attache avec des chaines plus fortes les animaux les plus fiers & les plus puissants comme les lions, que ceux qui sont d'une nature plus douce & plus sociable: de même la raison veut que nous tenions le Roy d'Espagne attaché à l'alliance de ceste Monarchie, avec des liens plus forts & plus estroicts, que ceux dōt nous sommes vnis avecques les autres Roys, attendu qu'il est tousiours vtile des'allier avec vn Prince, quand il est dangereux de n'en estre pas allié. Qui se peut donc offenser qu'iniustement, que le Roy comme pere de son peuple recherche le bien de son peuple, & procure la conseruation de l'Eglise, comme ayant l'honneur d'estre Fils Aîné de l'Eglise, comme ayant esté instruit en l'Eglise, comme ayant receu le Sceptre & la Couronne dans l'Eglise? FRANCE, ma chere Patrie que depuis vne si longue suite de siecles & de Roys, Dieu a perpetuellement con-




seruée contre tant d'ennemis qui t'ont assaillie, & qui maintenant reposes si doucement sous le regne d'un ieune Roy conseillé par vne grande Reine, qui ne respire que l'honneur de Dieu & que ta foelicité, sois sage par tes dommages passez, & ferme l'oreille a tous ces faux bruits que les ennemis de ton repos sement dans tes villes & dans tes Provinces, afin que tu tournes encore tes armes contre tes propres entrailles, que les peres trempent leurs mains de rechef dans le sang de leurs enfans, que les freres s'arment contre les freres, les beaux-peres contre les gendres, les parents contre les parents, & que le iuste courroux de Dieu te face seruir d'un particulier exemple de calamité pour estonner tout le genre humain. Et toy P A R I S, la Ville capitale de la France, le séjour ordinaire de nos Roys, l'abord de toutes les nations, la retraite des grands esprits, l'ornement de l'Estat, & le centre de toutes les richesses de l'Vniuers: Paris que le feu Roy Henry le Grand a honorée de tant de belles immunités, enrichie de tant de biens, illustrée de tant de marques de pieté, & ornée de tant de grands & magnifiques bastiments

que d'un desert que tu estois durant la guerre civile, il en a fait la plus riche, la plus populeuse, la plus auguste, & la plus celebre ville de toute la terre, resouviens-toy incessamment des bien-faits de ce grand Monarque; recognoy son image & les vertus en la personne de ton Roy son successeur; tourne les yeux sur luy comme sur l'Astre de l'influence duquel tu dois attendre tout ton bon-heur; represente-toy qu'une grande ville n'est iamais en plus grand danger que quand elle est en vne si eminente prosperite, qu'est celle ou la paix t'a fait paruenir? C'est lors que la felicité l'aueugle ordinairement, que la fortune la trompe, que la presumption l'emporte, & luy done l'audace d'entreprendre des desseins qui la ruinent à la fin? Imagine-toy tousiours que tant plus vne ville est opulente, & plus elle a besoin de protection; que plus sa fortune est grande & plus elle est enuiee, & que c'est lors que les autres villes jalouses de ses richesses ne font qu'attendre qu'elle manque a son deuoir, pour la destruire, & pour triompher de ses despouilles: Resouviens-toy du temps que ta rebellion prouoqua l'ire de Dieu, & que la fureur de la guerre qui

abbatoit tes habitans comme la moisson  
 d'une campagne, ne te faisoit pas tant de  
 mal par dehors que t'en faisoient par dedās,  
 la peste, la famine, & les tyrans domesti-  
 ques dont la rage ne pardonnoit pas mes-  
 mes au pourpre des Magistrats: N'oublie  
 iamais que c'est la benedictiō de tō Roy,  
 & le merite de ton obeissance qui te cō-  
 blēt d'hōneurs & de biēs; & qui fōt qu'au  
 lieu de la foudre du Ciel la manne tombe  
 dessus toy, que tu vois l'abondance au  
 lieu de la famine, la paix au lieu de la guer-  
 re: bref, pense tousiours qu'il ny a sorte  
 de graces que tu ne doiues esperer en de-  
 meurant constamment en ton deuoir, ni  
 malheur que tu ne doiues craindre lors  
 que tu t'en esloigneras.

F I N.





*DISCOURS SUR L'INIUSTICE DES  
plaintes qu'on fait contre le gouvernement de l'Estat.*

**I**L y a desia quelque temps, que ceux qui s'imaginent ne pouuoir trouuer aucun repos, sinon dans les troubles; qui veulent se baigner dans le sang des François, & qui recherchent pour apuyer leur maudite ambition, les es-motions, & la ruyne entiere de ce ceste florissante Monarchie, ne cessent de rechercher obstinément tous les moyens qu'ils peuuent estimer les plus propres, pour paruenir à vn si execrable dessein. Quand ils se voyent estre repoussez de quelque costé, ils courent de toutes parts, comme des enragez, iusques à ce que quelque autre occasion s'offre à eux, pour seruir à leurs damnables intentions: comme s'ils tenoyent la paix publique assiegee avec resolutiõ de la faire perir, & tout l'Estat avec elle: Ils ne se lassent point, d'employer toutes sortes de machines, de la forcer de tous costez, & se glorifiẽt d'auoir prins à tasche de la rẽuerfer, & d'estruire entierement. Ils ont failly à leur coup, lors des mescontentemens de quelques grands du Royaume, ausquels la Reyue, par vne prudẽce & douceur incomparable, a iusques à present tres-bien pourueu. Ils ont esté frustrez ès mouuemens de ceux de la Religion Preterenduẽ Reformee, qui ont esté dissipẽz par l'autorité du Roy. Ils n'ont peu dans le Parlemẽt de Paris, qui est le vray Temple de la Paix, trouuer vn iuste suiet pour troubler le repos de l'Estat. Ils n'ont sceu porter les Estats Generaux, au mespris de leur Souuerain, & ont

de la robe  
ne  
Catalgou

veut tout au contraire, que ce corps representant tout le Royaume, n'a trauaillé que pour affermir la paix, & l'obeyssance de tous les François à leur Roy. Ils ont veu que ceste assemblee en corps estoit inuincible, que tous les artifices qu'on employoit pour la diuiser estoient sans effect, & que ces parties nobles de l'Estat ne vouloyent point receuoir aucune mauuaise impressiõ de rebelliõ ou desobeissãce. Maintenant comme s'ils vouloyent tirer ces fleches hors de la trouffe, pour les briser estant separees n'ayant sceules ployer seulement lors qu'elles estoient conioinctes: N'ozans point assaillir l'Eglise qui aura tousiours les oreilles bouchées à leurs enchantemens, & la bouche ouuerte pour descrier les maux qu'ils veulent faire à la Religion & à l'Estat: N'ozans point se promettre que le peuple, sur lequel tombe à la fin tout le malheur des guerres, veuille estre celui qui prendra le feu à la main pour embrazer cet Empire. Ils ont estimé que le plus seur moyé pour ruyner l'autorité du Roy estoit, d'es-mouuoir la Noblesse qui est son bras droict, de l'animer à l'encontre du Gouuernement qu'elle a tousiours fidellement soustenu: Et comme s'ils dressoyent l'appareil d'une sanglante tragedie, ils ont fait depuis peu monter sur le theatre, non pas la vraye Noblesse Françoisse, mais quelques detestables seditieux, quelques esprits perdus, quelques bastards, & degenez François, que faulxement & meschammét ils appellent, *La Noblesse Françoisse au Chancelier*: à laquelle ils font tenir, non pas les discours quiluy sont ordinaires, & desquels elle doit vser en parlant

de leurs Majestez, & du gouvernement de l'Estat: mais bien les plus furieux, & les plus desbordez, dont puissent iamais vser ceux qui auront dessein de viure sans Dieu, sans Roy, sans repos, & sans Noblesse. Mais commel'Hyene furieuse qui contrefait la voix des hommes sur les chemins, deuore à la fin ceux qui s'amusent à l'escouter: Ainsi ces forcenez, qui prennent le glorieux nom de Noblesse, qu'ils desmentent par leurs œuures execrables, ne peuvent par la suite de leurs discours supposez, de leus menaces seditieuses, & de leurs escrits detestables, que causer la ruine & la destruction de ceux qui leur donnent audience, & qui se laissent gaster le cœur, du venin de leurs tragiques & sanglantes exclamations: Car l'esprit qui les possède est celuy-là mesme qui a introduit le premier au monde l'effusion du sang, les cruautez, les calōnies, & la ruine des hômes, qui a aussi exprimé au vis son naturel en tous leus discours qui ne tédēt qu'a perdre & destruire tous les François par le moyen des guerres ciuilles: & qui pour y paruenir plus facilement employent des impostures, & faussetez horribles, qui sont les exercices ordinaires de l'ënemy cōmun du genre humain, qui est appelé pour ceste raison le pere de mensonge. Et de fait cōme il est faux en toutes sortes que iamais les Deputez dela Noblesse en corps ny aucū d'eux en particulier, ayēt tenu à Monsieur le Chancelier les discours que ce malheureux rapporte: Aussi est-il plus faux que la fausseté mesme, que tels discours, ayēt peu estre conceus dans le cœur, ie ne diray pas de Messieurs dela Noblesse, mais mesme d'aucun bon François de quelque conditiō moins



releuee, n'ayans peu estre formez qu'en l'esprit de quelque beste furieuse, ou de quelque monstre, qui ne tient rien de l'homme que la parole & la main. Ce n'est pas la Noblesse Françoisse qui ne se souille, & ne se deshonore iamais en publiant des libelles diffamatoires: Car c'est le crime ordinaire des ames basses, lâches, & noires, qui mettent leur felicité à mesdire en cachettes, de ceux qu'ils flattent ordinairement en public. Ce n'est pas la Noblesse Françoisse, qui deteste toute sorte de mensonges, n'y ayant point de vice pour le reproche duquel, elle se porte plustost à exposer sa vie, que celui de l'imposture. Ce ne peut estre la Noblesse Françoisse, qui est l'honneur de ceste Monarchie, la gloire, & la force de nos Roys, le soustien des peuples François. & l'appuy de l'Estat, puis que ceste Noblesse masque, ceste cohue de seditieux, ceste bande infortunee & maudite qui desrobe fausement le nom duquel elle est indigne, ne recherche par ces escrits horribles, que l'opprobre de ceste Monarchie par le renuersement de l'ordre, & du respect des loix, que la diminution de la gloire, & de l'autorité du Roy, que la ruine des peuples, que l'esbranlement de l'Estat, & la subuersion entiere de la Pieté, & de la Religion. Ce ne peut estre la Noblesse Françoisse, qui a l'honneur d'approcher de leurs Maiestez autant de fois qu'elle veut, qui leur parle avec toute liberté, qui les voit tous les iours iusques dans leur cabinet, puis que ces seditieux qui paroissent en son nom, se plaignent, *d'auoir esté exclus de pouuoir parler à*



*leurs Maieſtez. Comme ſi elles eſtoient enfer-*  
*mées, ne ſe communiquoient à perſonne, a-*  
*uoiet l'oreille ſourde aux plaintes qu'õ leur fait*  
*ou comme ſi on pouuoit perſuader aux peu-*  
*ples ainſi qu'on fit au ſiecle dernier, que le Roy*  
*& la Reyne ſa Mere ſont priſonniers, & n'ont*  
*pas aſſez de liberté pour cõmander. En fin c'eſt*  
*tout autre choſe pluſtoſt que le diſcours d'hõ-*  
*mes qui ſoient Chreſtiens, Francois. & Gen-*  
*tilshommes, que de proteſter, De ne vouloir*  
*plus attendre du Conſeil du Roy le remede aux de-*  
*ſordres de l'Eſtat: Que c'eſt le Conſeil qui en me-*  
*dite la ſubuerſion: Que le gouuernement du Ro-*  
*yaume a eſté perniciieux depuis la mort du Roy*  
*que la regence de la Reyne a eſté eſtablie contre les*  
*loix fondamentales du Royaume: Que la Nobleſſe*  
*eſtraitee plus barbaremẽt qu'à la Turquie: Que ce*  
*Royaume eſt la retraicte des Tyrans. c'eſt la voix*  
*non des Gentilshommes, mais de quelques fu-*  
*rieux, laquelle ie ne puis rapporter qu'auec*  
*horreur, qu'aucun ne doit lire qu'auec exe-*  
*cration, Qu'ils proteſtent de nullité & tyrannie,*  
*contre tout ce qui s'eſt fait, & fera deſormais en*  
*l'adminiſtration du gouuernement. Appellans*  
*auiſi la regence de la Reyne, & la conduite*  
*des affaires de l'Eſtat, que le Roiluy a dõnée,*  
*que tous les Parlemens de la France, les Eſtats*  
*Generaux du Royaume, tous les Ordres, &*  
*generalement tous les bons François, ont ap-*  
*prouuée, & la celebrent encores tous les iours*  
*auec toutes ſortes d'applaudiſſemens, l'appel-*  
*lans, diſ-ie, auec vne impudence deſbordée*  
*& digne d'yn chaſtiment exemplaire, Vn meſ-*  
*pris des Loix fondamentales & des conſtumes ob-*

*seruees pendant le bas aage des Roys.* Mais ce qui  
 assure tous les gens de bien, contre l'artifice  
 de ces calomnieurs : c'est que le sens com-  
 mun mesme suffit pour enseigner aux plus stu-  
 pides, que nul ne pouuoit mieux affectionner  
 le bien des affaires du Roy, que la Reyne sa  
 Mere, de laquelle seule, par la benediction de  
 Dieu, l'Estat a retiré les moyens paisibles de sa  
 conseruation, qui ne se pouuoient en aucune  
 autre personne qu'en elle, comme vn chacun  
 le 'confesse aujourd'huy ouuertemēt. C'a esté  
 aussi la Loy ordinaire de l'Estat, & la coustume  
 obseruee autāt de fois qu'o a vescu en paix du-  
 rant le bas âge des Roys, que de déferer la cō-  
 duite des affaires à leurs meres, lors que les  
 Roys n'y auoiēt point pourueu par leur Testa-  
 ment ou par autre declaration expresse. Et la  
 raison en est bien euidente, en ce que leurs me-  
 res ne peuuent rien gagner au changement de  
 l'Estat, que c'est autant comme si on leur des-  
 chiroit le cœur, que de procurer quelque dimi-  
 nution à l'autorité des Roys, & quelque chā-  
 gement en la Maieité, & splendeur de leurs E-  
 tats, & en ce que la pieté qu'elles ont pour les  
 Roys leurs enfans, ne peut estre destruite, qu'e  
 estouffant entierement les loix de la nature.  
 L'euenement aussi a monsté à diuerses fois,  
 que tous les autres moyens qu'on a employez  
 pour pouruoir au gouuernement, ont esté or-  
 dinairement suivis de mal-heurs funestes, &  
 eussent sans doute en ce tēps plus qu'en nul au-  
 tre, attiré sur tout ce Royaume de tres-horri-  
 bles confusions, avec des ruines toutes certai-  
 nes. Chacun aussi s'esfouyt grandement, de

voir que le Roy, depuis la majorité a assés de droit, & de pouuoir, pour reprimer l'ambition de tous ceux, qui voudroient se porter à vn dessein si detestable, que de desirer d'entreprendre malgré luy, sur la conduite de l'Estat. En outre la Noblesse à tousiours hay les Guerres ciuiles, comme la peste de l'Estat, & le plus grand mal heur qui luy pourroit arriuer. Elle à tousiours accoustumé de mettre l'espee à la main pour faire obeir le Roy, pour soutenir son autorité, & pour chastier les rebelles, & les sedirieux. Elle a esté tousiours la premiere à immoler sa vie, pour destourner les malheurs du public. Elle est dans le corps de l'Estat, ce que les esprits animaux sont dans les corps humains, ayant le Roy pour son Principe, & ne semouuant que par ses loix, & par sa volonté. Il est donc impossible en toutes sortes qu'elle ait voulu se laisser emporter, à vne si impie, & maudite resolution que de persecuter le Roy par felonie durant son bas aage, d'affliger la Reyne par des menaces furieuses, de deschirer les loix del'Estat, de menacer, *de courir sus à ceux qui s'oposeront aux malheurs publics*, de diffamer par des calomnies horribles, les principaux Ministres du Roy, & d'apeler tout le monde au desorde, & à la confusion pour perdre & destruire ce Royaume, sous pretexte de le vouloir conseruer. Outre toutes ces preuues qui sont puissantes pour conuaincre que ce meschant abuse du nom de Messieurs de la Noblesse, les plaintes qu'il forme contre le Gouuernement sont si iniques qu'elles publiēt assés, que ceux qui souillent ce nom si illustre,



& si glorieux, sont ceux la mesme, qui ont tra-  
 uailé il y a desia long-temps, & qui ne cessent  
 encores tous les iours d'employer toutes les  
 plus peruerfes inuentions de leurs esprits pour  
 ietter des diuisions entre les plus grands du  
 Royaume. Vne de celles qu'il fait le plus faus-  
 sement, & avec vue profonde malice, *c'est qu'en*  
*l'assemblée des Estats on a enuoyé des Archers aux*  
*portes de l'assemblée, pour empescher que le premier*  
*Prince du sang ny fust receu* Et neantmoins tout  
 ce qu'il y a de gens de bien à Paris tesmoignent  
 ouuertement contre ce faulx faire, que les Ar-  
 chers, qui ont esté quelquefois enuoyés en  
 fort petit nombre, aux Augustins, durant la  
 tenuë des Estats, n'ont iamais eu autre char-  
 ge que de pouruoir, comme il est ordinaire de  
 faire aux grandes assemblées, que nul desor-  
 dre ne suruint par le moyen de la multitude  
 de toutes sortes de personnes, qui par curiosité  
 se portoiët en ce lieu la. Et cela a esté tousiours  
 ainsi fait pour éuiter les tumultes, & les bruits  
 qui arriuent aux entrées, & aux issuës, & le  
 plus souuën par le moyen des pages, & lacquais  
 que chacun a veu maintes fois vser de grande  
 insolence, en leurs cris, & bateries ordinaires,  
 nonobstant le soin qu'on auoit de les empes-  
 cher. C'ët ordre estoit deu à l'honneur, & au re-  
 pos de ce grand corps, qui representoit tout le  
 Royaume. La honte donques, s'il en reste en-  
 core quelque peu à cés mal-heureux, deuoit  
 elle pas leur arracher la plume des mains qu'ad  
 ils ont escrit, contre toute aparence que ces  
 Archers estoient destinés pour empescher l'en-  
 tree à Monsieur le Prince? Et ceux qui sçauent  
 quel



quel est le rang que les Princes du sang tiennēt en ce Royaume, qui sçauent que les Archers du grand Preuost, ne sont pas de telle qualité qu'on les voulust employer à vne charge de si grande conséquence, qui sçauēt que la plus part du tēps il ny auoit point d'Archers, & que lors qu'ils y estoient, leur charge estoient simplement de chastier les pages, & lacquais qui se portoit insolemment à l'entrée; Ceux qui ont esté tesmoins à Paris & dans l'assemblee des Estas, des choses qui sont aduenues durant ce temps là, ne iugeront ils pas facilement que c'est vne maudite inuention, & vn dessein pour faire croire aux peuples, que la maison Royale est trauaillée de grandes diuisions? Et ne sont ce pas des bouteux, qui semblent estre entretenus par quelques estrangers, afin d'enflāmer toutes sortes d'esprits, & pour semer la diuision en toutes les parties de l'Estat? Mais Dieu dissipera tous leurs conseils. Car monsieur le Prince qui sçait que telles personnes doiuent estre en horreur aux Grands, plus que tous les mauuais inconueniēs dont ils sçauoient iamais estre assaillis, sçait aussi qu'il doit destourner au loing toutes leurs praticques, & affermir au contraire, tous les iours l'autorité souueraine du Roy & la paix du Royaume. Il sçait qu'il est obligé de faire sentir à ces factieux, autant de fois que l'occasion s'en offrira que les grands ne peunēt iamais bien aimer, ceux qui taschēt d'aigrir l'esprit du Roy cōtr'eux; & ne peunēt au contraire que detester leurs mauuais cōseils, & esloigner d'eux avec horreur, & execration leurs personnes. Les Estats Generaux ont esté libres, & n'ōt

point esté retenus ny empeschés en leurs deliberatiōs par la presēce du Roy, de la Reyne, ou des princes. S'il auoit esté autremēt, que monsieur le Prince s'y fust trouué, ceux la mesme qui donnerēt lieu à ces inuētiōs auroiēt esté les premiers a publier, que la liberté des Estats auroit esté violée. Aussi c'est chose certaine que iamais Monsieur le Prince n'a fait semblant d'y vouloir assister, n'en a iamais parlé, ny fait parler à leurs Maiestez ny à aucun de ceux qui auoient entree aux Estats. C'est donc vne impudence bien afrenee au iourd'huy, qu'un chacun dans la foule entreprenne de faire des plaintes au nom de Monsieur le Prince, contre son gré, contre la verité, & à son desauantage. C'est donc vne passion furieuse de ceux qui n'ayment point le Roy, qui ne peuuent estre vaincus par la douceur de la Reyne, qui sōt irrités des benedictiōs que tous les François donnent à ceux qui nous conseruent la paix, & c'est cette passion qui les porte à faire croire aux peuples, que la force de cet Estat est tout diuisée & destruite. Au cōmēcemēt lors qu'il pleut au Roy de refondre la tenuē des Estats Generaux, par le Cōseil de la Reyne sa Mere, & ce auparauant que personne l'en requist, chacū sçait de quelles dissensions & factions ce Royaume estoit menacé: Car outre le mal-heur general des diuisions és choses de la Religion, qui donnoir iuste subject d'aprehension aux plus sages, puis que ç'a esté la premiere fois, que des Deputés autres que Catholiques ont esté reçeus en telles assemblees, il y auoit encore d'autres pratiques & menees dans les Prouinces, d'une infinité de personnes desi-

reuses des nouueautés, & changemens. Si les Gouverneurs des Prouinces suiuaient leur deuoir, & pour obuier à tous inconueniens ont eu soin sur les lieux, de moyenner que les Elections se feissent des personnes affectionnées au seruice du Roy, & à la paix, si les Estats estâs assemblés ont tous esté portés au bien, par vn cōmun consentement, s'ils ont vſé de tout respect, & obeissance aux cōmandemens du Roy, s'ils ont publié les obligatiōs que toute la Frâce à au Gouvernemēt de la Reyne, ces phrenetiques qui se desesperent parce qu'ils nous voyent en repos, s'escrient. *Que ce n'ont esté que brigues, ordures, & Tyrannie, qu'on a corrompu les vns et intimidé les autres.* Mais n'est-ce pas vne preuue pl<sup>r</sup> claire que le Soleil, que tout leur discours n'est autre chose qu'une desesperée calomnie, contre la Noblesse, en suite des autres libelles qui l'ont deschirée de toute sorte d'outrages, par ce qu'elle n'a point escouté, ceux qui la vouloient porter à la rebellion? Car les Députés de cēt ordre, qui ne croit point de posséder rien de solide, & permanent que l'honneur, lesquels ce faussaire fait icy parler contr'eux-mesmes, ayans tous cōspiré vnanimement au bien de l'Estat, & à rechercher le contentement de leurs Majestés, ozeroient auoir escrit à leur propre cōfusion, *Qu'ils ont esté partie corrompus, & partie intimidés?* Mais comment ont-ils esté corrompus, puis qu'ils n'ont eu autre but que de seruir le Roy, & d'affermir la paix? Et par qui est-ce qu'ils ont esté corrompus puis qu'ils n'ont rien fait, que sous le bon plaisir de leurs Maiestez? N'est-ce pas donc icy, vn exemple de la plus desordon-



nee insolence, dont iamais on ait ouy parler, & qui est sans aucun exemple dans nostre histoire, qu'on appelle aujourd'huy, *corrompus pensionnaires, & traistres*, ceux qui reçoient les bienfaits de leur Prince, qui le seruent contre les factions, qu'on veut former dans l'Estat, & qui n'ont autre volonté que de se conformer a ses commandemens? Mais la vraye cause de leurs iniures atroces, n'est elle pas parce qu'ils n'ont point voulu ouyr parler de troubler la paix dedans ny dehors le Royaume: qu'ils n'ont point voulu se laisser corrompre pour former vn parti dans l'Estat contre le Roy: qu'ils n'ont pas voulu seulement penser à tirer des mains de la Reyne le Gouuernement del'Estat, & qu'ils n'ont pas voulu donner lieu aux brigues qu'on à publiquement faites, à l'endroit de plusieurs, pour porter toutes choses aux extremités? Aussi peules a-t'on intimidez que corrompus. Car de quoy pouuoit auoir peur, la plus genereuse Noblesse qui soit dessous le ciel? De quoy est-ce que pouuoient estre intimidez ceux qui diroient encore fort genereusement à Alexandre s'il reuenoit *Qu'ils n'ont peur de rien si ce n'est que le ciel ne tombe*? Et de quel costé leur seroit venuë la peur? Seroit ce de la debonaireté nempareille du Roy, où del'excessiue bonté de la Reyne? Non non: s'ils ont eu crainte, ç'a esté comme ceux qui ayment Dieu, qui n'ont autre peur ny crainte que de l'offencer, & qui n'aprehendent pas en esclaves la seuerité de ses chastimens, mais detestët cōme vrayes enfans, l'iniustice qu'on cōmet en l'offrçant. Ceux aussi qui ont eu l'honneur d'assister aux Estats, qui



ont leu les cahiers pareux présentés au Roy, qui ont considéré le nombre, & l'importance des articles par eux proposés pour le bien de l'Estat, ne iugeront iamais qu'il y ait eu corruption, ny terreur quelconque, qui les ayent empeschés de faire, & procurer le bié du Royaume, autant que la condition du temps present, (la consideration duquel est tousiours la loy supreme de la reformation des Estats, ) l'a peu permettre. Ie ne voudrois point renouveler la memoire des miseres qui ont travaillé nos peres au dernier siecle, que ie voudrois au contraire estre esteinte pour tout iamais, & ie supplie tres instamment tous les gens de bien, qui les ont veüs, ou qui les lisent, de trouver bon, que nous deuenions sages à nos despens, que nous aprenions par les fautes que nos Peres ont faites à n'en faire point de semblables, & que nous formions sur les obseruations de leurs mal-heurs, des reigles & maximes infailibles qui nous seruent a les eniter. On a veu autresfois assés souuent, que ceux qui poursuioient par tous les artifices à eux possibles, que le peuple fust surchargé, & foulé par des nouuelles, impositions estoient eux mesmes les premiers qui crioient apres à l'encontre en faueur des peuples, pour rendre odieux nos roys & pour aduantager leurs factions dans ces mescontretemens publiqs. Chacun le voit, & pleust à Dieu qu'il ne fust pas vray! que ceux-là mesme, qui suscitent tous les iours de nouuelles affaires au Roy, & à ses ministres, pour les empescher de resoudre pleinement les responce des cahiers des Estats Generaux, sont eux mes-

mes les premiers qui en esmeuent les plaintes, & qui crient qu'on n'a point pourueu à les faire respondre pour soulager le peuple, & pour cōtenter tous les Ordres. Chacū sçait, & on ne le pourroit pas auoir si tost oublié, que ceux-là mesmes qui auoyēt animé les Deputez à poursuivre la supression du droit annuel, ont esté ceux qui ont tout ouuertement aidé à fomen- ter & accroistre le ressentiment general, qu'on a veu dans tout le Royaume, en toutes les cō- pagnies de Iustice, ausquelles ceux là mesmes qui en auoient procuré le mescontentement, n'oubloient pas de reprocher, que c'estoit vne pauvre recompense qu'on leur donnoit, d'a- uoir contenu les peuples en deuoir, & dans l'o- beyssance du Roy. Et nous ne sentirons pas en- cores que la faction se forme tous les iours dans l'Estat au preiudice des droicts dū Souuerain? Et nous ne confesserons pas que plusieurs re- cherchent à quelque prix que ce soit, de ruiner & de schirer la paix? Mais puis qu'ils se plai- gnent de ce que le Roy, a fait pour l'annuel, il est iuste qu'un chacun voye le peu de subiect qu'ils en ont. C'estoit le feu Roy qui l'auoit pre- mieremēt estably, plustost à la poursuite d'au- truy, que par sa propre inclinatio. Ce que sans doute il n'eust pas fait, s'il eust preueu que c'estoit le moyen pour renuerser avec le temps l'administration de la Iustice, pour ruiner la plûspart des familles par le prix excessif des Offices, pour esleuer plusieurs à vn abus tres-insolent des charges publiques, pour y ap- peller grand nombre de personnes, plustost par le moyen des finances, que par les degrez de l'honneur & de la vertu, pour oster dans l'esprit de plusieurs le sentiment de l'obligation que tous les Officiers doi-

uent auoir au Roy, car l'opinion que la grande despence qu'ils font pour y paruenir, leur fait facilement conceuoir, de n'en estre tenus qu'à leurs fortunes, & non pas au choix ou à l'eslection de celuy au nom duquel ils tiennent leurs charges, Et finalement s'il eut preueu les difficultez qu'il y auroit quand on le voudroit esteindre, & les mescontentemens de ce grand & effrené nombre d'Officiers de Justice, & des Finances. Et ce que le feu Roy n'auoit pas preueu, nous le sentôs & le voyons tous les iours: & principalement le grand & extreme déplaisir que tous les Officiers ont eu à la nouuelle de la suppression de l'annuel, & de la venalité des offices que le Roy auoit accordée, pour descharger & soulager tous ses pauvres subiers. Car on a veu de toutes pars des mouuemens, desquels ie croy qu'il vaut mieux se taire prudemment, que de les publier à la honte de leurs autheurs, au deshonneur du siecle où nous sommes, & à l'infamie eternelle de ceux qui ont voulu par ce moyen troubler la paix. Ce qui a esté l'vnique & la vraye cause pour laquelle le Conseil du Roy a sagement donné l'Arrest du treziesme iour de May de ceste année, pour lequel on ne peut pas le blasmer iustement d'auoir reuoké la parole qu'il auoit solemnellement donnée aux Deputez des Estats, puis qu'il a esté nécessairement obligé par les plainctes qui venoient de tous les endroits du Royaume, de par les Officiers, & par beaucoup de grandes considerations d'Estat, qui ne pouuoient souffrir qu'en ce temps on mescontentast vniuersellement, ceux qui ont la principale authorité dans les villes, qui ont tres-bien seruy aux dernières occasions, & qui par l'interest de leurs familles, se trouuent grâdemēt necessitez à maintenir la paix, & tranquillité publique. puis aussi qu'il est notoire que la parole du Roy n'est pas reuokée simplement par l'arrest, veu qu'elle aura son effet, au temps qui suivra celui de l'accomplissement du contract fait avec ceux qui en ont le party. qui tombe iustement en l'annee 1617. y ayant eu quelque raison de ne desroger point facilement aux Arrests du Conseil donnez pour l'annuel les années 1611, & 1612. ny à vn contract passé par le Roy, sur la foy duquel



vne infinité de personnes auoient employé tous leurs biens pour acheter des Offices. Il n'est pas aussi iuste de vouloir avec malice, que les paroles du Roy soient irreuocables comme les Edits de Perle, quand il y va de l'intérêt de l'Estat, & de la paix & seurété publique: Puis que le mal-heur du temps où nous sommes, l'iniquité de plusieurs, les factions qu'on tâche d'establir dans l'Estat au preiudice de son autorité, & l'artifice de ceux qui auoient desiré qu'on ostast la venalité: & qui neantmoins ont esté les premiers qui ont fomenté les plainctes des Officiers: & les ont irritéz contre la deliberation prise sur leur instance, & à leur poursuite puis, dis je, que toutes ces considerations tres-veritables, sont autant de raisons puissantes & necessaires, qui ont meu le Roy de s'accommoder à la necessité des affaires, & à la volonté de ses subiects, comme le pere en vse ordinairement à l'endroit de ses enfans & Dieu mesmes à l'endroit de ses creatures. La procedure donc qui a esté tenuë en ceste affaire, ferme la bouche à ceux qui se plaignent. Messieurs du Clergé, & de la Noblesse, ont desiré aux Estats que le droit annuel fust osté. Ceux du Tiers Estat, c'est à dire presque tous les Lieutenans Generaux du Royaume assemblez, ont desiré soit que ce fut pour aneantir ceste proposition ou autrement, que le Roy ostast tout a fait la venalité des Offices. Le Roy pour les contenter tous a déclaré, qu'il supprimoit l'annuel & la venalité. En ce mesme temps, & cela ne se peut pas nier, on a veu que tous les Officiers du Royaume, ont crié, & se sont plaints de tous costez, afin que ie ne die pas dauantage. Sur cela le Roy a déclaré, que sa parole n'aura point son accomplissement, que d'icy à deux anneés, que le terme du contract sera expiré. Ceux qui ozent mëschamment & avec des paroles dignes de mort, blasphemer contre le Roy, & à ceste occasion sont-ils pas dignes de la haine du Ciel, & de celle des hommes? ce n'est pas que ie veuille flatter le mal-heur de ce siecle, ny louer la venalité des charges, de quelque nature qu'elles soient, puis que c'est vne des plus grâdes ruines: qui menacent l'Estat,



& qu'il a esté tresbien dict par les Grecs, d'un de leurs Empereurs, qui auoit vendu les dignitez de l'Empire, *Qu'il auoit changé la Monarchie en Aristocratie*, la Royauté en vn gouuernement populaire, & s'estoit fait par ce moyen beaucoup de compagnons, comme nous ne le ressentons que trop tous les iours en ce Royaume : puis aussi que c'est vne des choses qui attirent le plus sur nous les verges de Dieu, aux oreilles duquel la voix & les plainctes des peuples oppressez par l'auarice des mauuais Iuges crient incessamment, & demandent vengeance. Mais ce que ie veux seulement, c'est de monstrier que c'est encore vn mal necessaire dans l'Estat, qu'il faut que nous souffrions avec patience, sans blasmer les actions de ceux qui gouuernent, qui gemissent eux-mesmes plus que nous, de se voir gehennez & forcez de fieschir & de ployer l'autorité publique, & à rabattre de la vigueur des resolutions prises pour le bien du Royaume, afin de ne hazarder rien mal à propos, en vn temps auquel il semble que tous les François conspirent à destruire le respect qui est deu aux loix de l'Estat. C'est aussi avec outrage qu'ils se plaignent que le Roy continuë les pensions : Car ils voudroient sans doute exciter encores de nouueaux mescontentemens par ce moyen : Et tel en crie le plus, qui en a plus qu'il n'en merite, ou qui est despité de n'en auoir autant que sa conuoitise effrenée en desire. La proposition qu'on fist de les oster, estoit vn contre-coup donné à Messieurs de la Noblesse, par ceux qui se faschoient qu'on ostant l'annuel : Mais s'il plaist à Dieu, le Roy pouruoirà les contenter tous, quand il en sera temps, & soulagera

par ce moyen son peuple, au grand regret de ceux qui par ces escrits venimeux pourchassent de le mettre en ruine. La Chambre de Iustice qu'on n'a point voulu establir pour la recherche *des abus commis aux Finances*, est aussi vn des articles qu'ils font pour descrire le gouuernement. Et par là on decouure clairement que ces gens desirent avec vn transport demesuré, de voir le desplaisir & les mescontentemens de toutes les parties de l'Estat: de la Noblesse en ostant les pensions de la Iustice en ostant l'annuel, de tous les Officiers des Finances par la Chambre de Iustice; afin que les factions puissent plus facilement prendre pied, & gagner place dans les cœurs de ceux qui prefereront leur interest à celuy du public, desquels le nombre sera tousiours beaucoup plus grand que ceux qui voudroient par leur perte, seruir au bien du general. Que s'il estoit aduenu que le Roy eust voulu espraindre, comme disoit quelqu'vn autresfois ceux qui sont les vrayes esponges de ses finances, on auroit crié infailliblement, que ce n'estoit point pour le Roy qu'on le faisoit, mais pour faite passer és mains des particuliers, les despouilles des meilleures familles de Paris, & d'ailleurs. On eut veu de toutes parts multiplier les plainctes de ce nombre excessif, & presque insupportable des Officiers des finances: & parauenture eust-on deploré de voir encor vne fois les bons porter la peine des mauuais, avec vn desplaisir extresme de ceux qui aiment la Iustice. Ceux donc qui s'imaginent de telles reformatiions dans l'Estat, durant le bas âge du Roy, sont semblables à ceux qui tuent les corps humains, à force de les purger & saigner: Et ie ne

croy pas mesmes qu'ils soient si peu hardis, qu'ils n'ozent quelquesfois s'en prendre contre Dieu, parce qu'il supporte & endure vne infinité de maux entre les hommes, qu'il pourroit facilement oster, voulant par sa patience conseruer en ceste sorte l'ordre de l'Vniuers. Que si c'est l'amour & la charité qu'ils ont pour le bien de ceste Monarchie, qui leur fait faire ces propositions en ce temps icy, c'est de leur deuoir d'y conioindre la prudence, & de reconnoistre qu'elles seront bonnes à faire, à refoudre, & à estre vigoureulement & viuement mises à effect, lors qu'il aura pleu à Dieu d'en donner au Roy avec la volonté, le moyen si aisé & si facile qu'il ne puisse plus apprehender que les remedes qu'on employera à la guerison de l'Estat, ne soient pires que les maux mesmes qui le travaillent. Ils se plaignent des diuersitez & mutations qu'on voit és conseils qui ont esté pris pour des affaires fort importantes, & nous proposent cellecy, comme la plus digne de leur obseruation, apres celle de l'annuel, *Que le Roy auoit de sa bouche ordonné à ceux de la Religion pretendüe reformée, la ville de Largeaux, pour estre le lieu de leur assemblée politique, neantmoins bien tost apres on leur a assigné Grenoble:* Mais pour ne dire rien des iustes raisons qu'on a eu de preferer l'un à l'autre, pour gratifier ceux qui en ont fait la poursuite : Il est certain que ceux-là mesmes s'en pleignent, qui sont faschez de voir que le Conseil du Roy mette vn grand soin à preuenir toutes leurs mauuaises intentions, les empeschant par ce moyen d'aduancer leurs affaires dans le mescontentement de leur party : Duquel aussi en ceste plainte, ils publient la mauuaise conduite,



à leur honte, & à l'honneur des ministres du Roy ; qui pour empescher leurs mauuais desseins, moyēnent que le Roy, comme pere commun de ses subjects, ayme mieux supporter leurs deffauts, & leur donner loisir de se recognoistre, & de faire mieux, quē d'vser de toute rigueur enuers eux, puis qu'ils se iettent à ses pieds, qu'ils le supplient avec toute humilité, & qu'ils ayment mieux obtenir ceste grace de sa Majesté seule, que d'y employer le credit & la faueur de ceux qui abusent trop souuent de leur nom, pour destourner le cours des affaires publiques : ausquels aussi si leurs Deputez se fussent adressez pour obtenir ce changement, ils auroiēt eux-mesmes, en cas de refus, crié les premiers tout au contraire de ce qu'ils font maintenant. Ceste procedure est si cogneuē, & ils l'ont si souuent tenuē, qu'on ne s'en estonne plus à la Cour. En vn mot, le Roy sans contredit, peut & doit ordonner à ceux de la Religion pretenduē reformée le lieu de leur assemblée. Il y a quelque temps qu'il leur auoit donné Grenoble: mais parce qu'ils eurent quelques ombrages contre monsieur le Mareschal Desdiguieres, ils insisterent en leurs supplications à ce qu'ils ne fussent pas obligez d'y aller, & aymerent mieux desirer la tenuē de leur assemblée, pour voir aussi par ce moyen quelle seroit l'issuē des Estats Generaux. Depuis ce temps-là, le Roy desirant gratifier quelques-vns d'entre eux, à leur instance & poursuite nomma Iargeaux : Mais parce qu'il y eust encor parmy eux quelques nouveaux subjects d'ombrage, contre ceux que le Roy auoit desiré de fauoriser par l'eslection de ce lieu, ils le supplierent tres-humblement qu'il leur fust per-



mis d'aller à Grenoble. Les raisons qu'on auoit eu la premiere fois pour les y enuoyer estât tousiours les mesmes, le Roy ayant ordonné ce lieu là au commencement, & la diuersité n'estant venue que de leurs diuisions: Il est tres-certain que ceux qui se faschent de ce qui a esté fait, sont marris que le Roi ait voulu contenter ses subjects malades & difficiles, & qu'il ait voulu s'accommoder à leurs volontez, pour les obliger par sa douceur a vser dans leur assemblée de toute modestie, & à ne rechercher que la paix & l'observation des Edicts, pour le bié de son seruice: Comme il y a apparence qu'ils ferôt s'ils ont desir de ne se rendre point odieux au Roi, & insupportables à l'Estat, par le mespris & l'abus des graces qu'on leur fait tous les iours. Ceux-là mesmes qui se faschent qu'on change les deliberations du Conseil és affaires, desquelles le changement a eu pour but la paix & le repos du Royaume, font tout ce qu'ils peuuent pour obliger le Roy, au contraire a rompre sa foy, sa parole, & son mariage, parce qu'ils croyent que l'issüe de ceste rupture leur donneroit des éuenemens conformes à leur humeur, & à la haine qu'ils ont conceüe contre la paix: Car combien qu'ils facent semblant de ne desirer si ce n'est qu'on la differe: neantmoins chacun voit à quoy ils tendent, & que c'est leur interest qui les pousse, & non pas celuy de l'Estat ny de la Religion. Nous voyons aussi que nonobstant que le corps des Estats Generaux ait supplié tres-humblement la Royne pour l'accomplissement du mariage du Roy: toutesfois ce mal-heureux Escruiain, duquel nous descouurons les impostures, fait parler la Noblesse au contraire, avec des termes dignes des plus extremes supplices. Qu'un

chacun donc iuge que ce n'est point la Noblesse Françoise au nom de laquelle il parle: mais plustost que c'est au nom de ceux qui sont reconus de tous comme les pestes del' Estat, & les monstres qui recherchent sa ruine. On sçait que ç'ont esté Messieurs les Princes du Sang qui ont agreé ceste Alliance, & qu'on ne la pourroit auourd'huy differer ny violer sans le deshonneur du Roy, & sans engager l'Estat aux mouuemens que ceux-là seuls peuvent desirer, qui recherchent leur contentement dās les miseres & calamitez publiques. Chacun iuge aussi facilement qui peuvent estre ceux-là par l'artifice desquels principalemēt ces plaintes sont semées parmy le peuple, puis que tant de gens diffament l'Alliāce d'Espagne, & il ne s'en trouue point qui écriue vn seul mot contre celle d'Angleterre. C'est aussi vne fureur desesperée qui les pousse en escriuant, *Qu'on stipule aux Espagnols pour dot de tels mariages, tout ce que nous possedons, nostre sang, nos vies, & nos amis.* Ce qui fait encore mieux cognoistre à ceux qui sont sans passion, que ceste Alliance est iuste, puis qu'elle est si iniustement assaillie, qu'elle est bonne, puis qu'on la diffame par des procedures maudites & detestables, & qu'elle est agreable à Dieu, puis que les meschans en font tant de bruiēt. Aussi ceux qui la descrient le plus, hayssent plus la paix & l'autorité du Roy, qu'ils ne hayssent les Espagnols, & apprehendent beaucoup plus qu'aucune autre chose l'establissement des affaires du Roy, l'affermissement de son autorité, la paix de la Chrestienté, qui semble ne pouuoir plus estre ébranlée, si ces trois grands Roys peuvent conuenir amiablemēt, & se proposer en commun ce glorieux & iuste dessein, d'empescher que les peuples

Chrestiens ne se destruisent plus les vns les autres. A quoy ceux qui sont agitez des passions d'auarice, d'ambition, & d'enuie, ne prestent point leur consentement, parce qu'ils n'ont point de felicité que dans la confusion, & ne croyēt point de deuenir plus grāds qu'ils ne sont, qu'en affoiblissant l'autorité du Roy, qu'en recherchant les moyens de se rendre necessaires, & qu'en destournant par leurs maudites menées tout ce qui peut servir à estouffer les factions qu'ils taschent de former dans l'Estat. Ce qui s'est passé à Iuliers, & le soing que le Roy a toujours eu des affaires de Messieurs des Estats publient assez que l'Alliāce d'Espagne n'est point faite au preiudice des Princes alliez de ceste Couronne, & que de leur costé ils n'ont aucun iuste subject de se plaindre : Car si le Marquis de Spinola a esté soigneux de conseruer les droicts d'un Prince Catholique, Messieurs des Estats auoient commencé eux-mesmes a tesmoigner le soin qu'ils ont de conseruer le bien d'un Prince Protestant, s'estans saisis des meilleures places qui fussent en la successiō de Cleues & Iuliers. Mais la passion nous aueugle au iourd'huy, & nous sommes si meschāns & si iniustes, de ne pouuoir souffrir qu'on face pour les Catholiques, autant pour le moins que Mrs des Estats ont fait, en faueur de ceux de leur religiō. La mesme iniustice se voit aux plaintes qu'ils font en faueur du Duc de Sauoye, qui sont si déreglées en ces libelles qu'il seroit aisé aux Iuges, prenāt la peine, de retirer d'icelles d'assez bōnes preuues contre ceux qui en sont les auteurs, pour descouurir de quel pays ils sont, & où ils ont attaché leur fortune : Car il faut de toute necessité qu'ils y pretendēt quelque grād interest en leur particulier, & que leur fin soit bien



mauuaife, puis qu'ils offenfent fi indignement le Roy, & tout le gouuernement de l'Eftat, qu'il n'y a aucû fujet naturel du Duc qui ozaft pis faire. Attendant que Dieu leur face trouuer le chafiment qu'ils recherchent par leur licence desbordée, faisons voir aux gens de bien que leurs plaintes font iniques. A la verité il feroit grandement à defirer, que cōme la valeur & le courage de ce Prince, font qu'aujourd'huy il eft en admiration parmi les plus belliqueux, & font caufe que fon commandement eft eftimé, cōme de celuy qui tient le premier rang entre les plus grands Capitaines de l'Europe. Il y euft auffi en luy pour temperer cefte ardeur, & magnamité d'efprit, la froideur & égalité aux affaires, que doiuent neceffairemēt auoir tous les Princes, qui ont leurs Eftats mediocres, & qui ont des voisins plus puiffans qu'ils ne font pas : Parce qu'il arriue fouuent, qu'à la longue ceux qui font les plus forts, font que les plus genereufes refolutions de celuy qui eft moins puiffant qu'ils ne font, fe chāgent, luy donnent fujet de fe douloir pour s'efre pris à eux, & luy font conceuoir vn iufte desplairir contre fes alliez de ne l'auoir deftourné par leur confeil, de fe laiffer trop aller à fuiure l'effort de fon courage. Comme il arriua, lors que pour acquerir la gloire d'auoir oppofé fes armes à celles du feu Roy, qui eftoit le feul homme digne de recommander les plus grandes armées, & les plus belliqueufes nations de la terre ; il attira fur luy fon indignation, & fur fes Eftats la fureur des armes Françoises, qui l'en auoient prefque entierement depouillé ; lors qu'il pleut au Roy, qui ne pouuoit efre vaincu que par foy-mefmes, de proposer à tous les Roys de la terre par fon exem-

ple, Que la plus grande gloire des Princes, c'est de pardonner & d'vser de leurs victoires avec moderation: Car sans cela, & si le feu Roy poussé de clemence, n'eust oublié le passé; il est certain que le trop grand courage de Monsieur de Sauoye l'auoit rendu en piteux estat. Il nous auoit osté le Marquisat de Saluces, lors que les calamitez publiques opprimoient la France, sous le regne du Roy Henry III. s'estant laissé violenter à son naturel belliqueux, sans quoy il eust peu considerer, combien nostre voisinage luy estoit utile pour la conseruation de ses Estats, & combien pouuoit estre salutaire à ses enfans pour l'aduenir, l'approche des armes Françoises, qui ont esté employées ordinairement pour le soulagement des foibles contre les plus puissans: cet Estat estant tousiours le vray arbitre des plus grandes & importantes affaires de la Chrestienté. A l'aduenement aussi du feu Roy à la Couronne, il auoit esté de ceux qui estimoient que ceste Monarchie s'en iroit en pieces, sans pouoir iamais plus recouurer sa force, & son ancienne splendeur; & ne peut à la paix de Veruins domter tellemēt son naturel aguerry, qu'il voulut tout à fait terminer avec la France ses differēs, desquels il prolongea l'accord tant qu'il peut, tesmoignant à tout le mōde, qu'il estoit plus propre à entreprendre sur les plus grands Estats de la terre, qu'à traiter des accords, & à se resoudre à la paix. Laquelle il n'eut pas plustost faite, que peu s'en fallut que ses desseings sur Geneue, laquelle non obstant la protection de la France, il cuida saisir, ne le remissent de rechef en guerre avec le feu Roy, qui dōna exēple par sa moderation aux plus grāds, d'vser prudemmet de leur courage, & de leurs forces,

de peur d'offencer celuy qui les donne. Depuis cela nonobstant tout le passé, il auoit commecé d'aimer le feu Roy, & en mesme temps ne se pouuant faire que la grandeur de son esprit & sa valeur, luy laissassent paisiblement iouir du repos, duquel tous les autres Princes Chrestiens iouyssoient; il delibera d'employer ses armes contre le Roy d'Espagne son beau-frere, se promettant la conqueste du Duché de Milan. Le feu Roy qui dōnoit la loy aux affaires de l'Europe, nous ayant esté en mesme temps rauy mal-heureusement, le Roy d'Espagne, qui auoit eu soin d'asseurer par les armes, les Estats qu'il a en Italie, estoit tout resolu de se ressentir contre son Altesse du dessein qu'elle auoit fait tout ouuertement d'enuahir ses Estats: Et les moyens qu'il auoit alors de le faire avec grand aduantage contre elle, comme ceux qui se cognoissoient aux affaires l'aprehendoient grandement, furent cause que la Roynes prenant en main son salut, & ne voulant point qu'il fut contraint de déplorer en sa ruine, que la France l'eut abandonné à son besoin, mit ordre en toute diligence, à ce que le Roy d'Espagne cogneut, que nonobstant que la France fut desnuee du feu Roy, & qu'elle fust plongée dās vn abyfme de douleurs, & de maux par le moyen de sa perte: neantmoins elle ne consentiroit iamais à l'oppression des Princes qui sont ses alliez: lesquels elle vouloit tout au contraire, cherir & defendre plus que iamais. Ce qui se fit avec tel effect, que le Roy d'Espagne, suiuant le desir de la Roynes, quita sa resolution, & retint l'aigreur qu'il auoit cōceue contre Monsieur de Sauoye, mettant ordre à faire retirer la pluspart des troupes qu'il auoit en Italie: Tesmoignant par ce moyen, que nos calamitez



n'augmentoient point le ressentiment de l'iniure qu'il croyoit luy estre faicte; & voulant que publiquement on recognust qu'il n'auoit pas dessein de se preualoir contre nous, ny contre nos allies, du mal-heur que la mort du feu Roy nous auoit apporté, & à toute la Chrestienté. Le soing donc que leurs Majestez ont eu de ses affaires a esté veritablement le plus grand secours qu'il eut iamais à son besoin. Dequoy toutesfois il n'a peu tellement se seruir pour maistriser son naturel, tout porté aux choses grandes & glorieuses, qu'il n'ait tousiours esté armé depuis ce temps-là; donnant sujet d'alarme, tantost à Messieurs de Berne pour le paispe Vaux, tantost à la Frâce mesme pour Geneue; Iusques à ce que le Duc de Mantouë estant mort, il ietta à l'instant ses troupes sur ses Estats, & renouuellant les anciennes pretentions de sa maison, pour le Montferrat, commença par l'exécution, fit sousleuer contre le Duc son allié ses sujets, saisit ses places, & entra sur ses terres à main armée. Quoy qu' auparauant il eut asseuré Monsieur le Marechal d'Esdiquieres, & celuy qui est agent pour leurs Majestez en Sauoye, qu'il ne vouloit point poursuiure son droit qu'en Iustice, ou par voye d'amis communs; & que mesme il eust fait commandement au sieur Iacob son Ambassadeur, de tesmoigner à leurs Majestez, qu'il vouloit remettre son droit au iugement des deux Roys, & suiure toutes voyes de douceur, plustost que d'en venir aux armes. Ce que toutesfois il fit en mesme temps, sans en donner aucun aduis au Roy, comme il estoit necessaire en vn affaire où le Roy auoit l'interest, de son affection enuers le Duc de Mantouë son parent, de sa dignité, s'estant offert

dés le commencement pour moyēner leur paix, & de la paix publique de la Chrestienté. Mais en ne consultant que sa valeur, Monsieur de Sauoye n'auoit pas preueu que les Espagnols, qui sçauoient les desseins qu'il auoit eu vn peu auparauāt cōtre le Duché de Milan, & qui estoient obligez à secourir le Duc de Mantouë, d'autant que son Estat est depuis long temps sous la protection du Roy d'Espagne, ne manqueroiēt pas dés qu'ils le verroient aux champs, de pouruoir par les armes, & à leur seureté, & à celle du Duc de Mantouë leur allié, Non plus qu'il n'auoit pas preueu, tant il a son esprit porté aux actions de la guerre, que la France ne pourroit pas souffrir, qu'il opprimast vn Prince qui a l'honneur d'estre cousin germain du Roy. Neantmoins comme cest Estat depuis la mort du feu Roy, a tousiours soigneusement éuité les occasions des troubles dedans & dehors le Royaume, la Royne enuoyant pour le Duc de Mantouë des troupes qui alloient seulement pouruoir à sa seureté, enuoya aussi d'autre part à celuy de Sauoye vne Ambassade extraordinaire, avec charge de moyenner la paix entre ces deux Princes, & de les faire conuenir & accorder de leur different qui esmouuoit ces commencemens de guerre. Durāt le traicté de Monsieur de Sauoye, plustost par desir & avec dessein de rompre la paix & l'amitié des deux Roys; que par aucune enuie qu'il eust de se fier en nous plustost qu'aux Espagnols, ou de nous donner aduantage par dessus eux en Italie, fit semblant pour lors de desirer que les François fussent depositaires des places qu'il auoit prises sur le Montferrat: Mais la iustice vouloit que nous n'entreprissions point cela, au preiudice de la protection

du Roy d'Espagne, qui auoit aussi armé le premier pour la deffense du Duc de Mantouë : la prudence & le desir de la paix entre les deux Roys, nous obligeoient à n'approcher point dans l'Italie les armes des François à celles des Espagnols, ny nos garnisons aux leurs: Et la difficulté eut esté grâde, quand il eust fallu pouruoir à ceux qui eussent eu le gouuernement des places, & le commandement des troupes Françoises en pais esloigné du Roy, & en vn temps où par la corruption des mœurs anciennes, il aduiant bien souuent que le respect qui est deu à sa Majesté ne se trouue pas tousiours tel qu'il faudroit en ceux qui commandent. L'euenement aussi ne nous a point donné sujet d'estre marris: Car depuis cela, le Roy d'Espagne contre l'opinion de plusieurs, a rendu de bonne foy toutes ces places au Duc de Mantouë, qui en iouit paisiblement, & qui mesmes n'en a point voulu retirer quelques-vnes des mains des Espagnols, que le plus tard qu'il a peu, apprehendant de ne les pouuoir defendre contre les armes de son ennemy. A l'instance donc de l'Ambassadeur de sa Majesté, ces deux Princes remirent leurs differens au iugement des arbitres. Mr. de Mantouë consentit de pardonner à ses sujets rebelles: & sur ce qu'il demandoit pour les grandes ruines qu'on auoit faites sur ses Estats, il s'en rapporta aux mesmes arbitres du principal different pour en iuger conjointement. On continua mesme à traicter le mariage de la Princesse Doüairiere de Mantouë, avec le nouveau Duc, suivant l'ouuerture qui en auoit esté faite par le Gouverneur de Milan; & il eut esté accomply si Monsieur de Sauoye n'eust voulu absoluëment, qu' auparauant on iugeast de leur diferent, qu'il vouloit



estre terminé, non par la Chambre Imperiale qu'il apprehendoit, mais par les arbitres : & que le Duc de Mantouë renonçast aux pretentions qu'il auoit eötre luy pour les ruines que son armée auoit faites en ses pais. Depuis, sur des nouuelles occasiöns, qui neantmoins en effect n'ont esté, que des pretexts du premier dessein qu'il auoit fait sur le Mötferrat, Il fit derechef auancer ses troupes qu'il n'auoit point congediées, entra plus ouuertement en piques avec les Espagnols, avec lesquels toutesfois, & par l'assistance de leur conseil & sans en donner aduis à leurs Majestez, il auoit traicté de tirer d'entre les mains du Duc l'Infante de Mantouë, & qui plus est s'esmeut tellemēt contrē ceux du Conseil desquels il s'estoit seruy, qu'il renuoya avec des paroles d'aigreur en Espagne, l'Ordre de la Toyson, & fust le premier qui se mit aux champs à main armée. Surquoy la Royne enuoya vn autre Ambassadeur extraordinaire, pour empescher que le mal n'allast en empirant. Et il est tres-vray que s'il eut voulu donner autant de lieu à nos prieres, qu'a fait le Roy d'Espagne, lequel s'est tousiours fort ouuertement remis à ce que leurs Majestez trouueroient bon, la paix auroit esté faite entr'eux il y a desia long temps: & les armées se fussent retirées au grand soulagemēt des pais de son Altesse, & avec toute seureté pour ses Estats, puis que le Roy en estoit garand, ayant esté prié par le Roy d'Espagne d'en prendre l'euenement sur soy, & d'asseurer que les Espagnols se retireroient, aussi tost qu'il auroit mis ordre à separer ses troupes. Ceux qui n'ont point de passion qui trouble leur iugement, verront aisémēt que ceux qui voudroiet que le Conseil du Roy eut pourueu par les armes à

mettre la paix entre ces Princes, ont vn dessein tout formé de mettre la Frâce en guerre avec l'Espagne à tout hazard, & à quelque prix que ce soit. Mais ils doiuent sçauoir que les Roys ont les loix & les maximes d'Estat qui reglent leurs affaires, qui sont fort esloignées des esmotiōs que la passion excite dans l'esprit des particuliers. Ce qu'on peut conuaincre en ceste affaire, par toutes les circōstances. Car quād on voit vn Prince allié commencer vne guerre, le premier secours que ses alliez lui doiuent, c'est de rechercher les moyens de paix, puis que la fin de toutes les guerres c'est la paix, qu'il vaut beaucoup mieux trouuer dès le commencement des affaires, si on peut, que de la rechercher par le hazard & les peines excessiues de la guerre, qui biē souvent l'acquierent au desauantage de celuy qui sans danger & sans mal heur la pouuoit trouuer dans les traittez, dès le commencement. C'est ce que le Conseil du Roy a faict en cest affaire avec beaucoup de soin; parce qu'on a veu que la magnanimité de Monsieur de Sauoye & son grand courage l'auoient fait resoudre d'entreprendre ceste guerre, sans aucune vrgente necessité: Parce qu'on a veu que ce ne sera iamais son bien, de se prendre au Roy d'Espagne: & ce seroit non pas secourir vn allié, mais le perdre, quē de luy donner le moyen de cōtinuer ses desseins, contre vne si grande puissance; parce qu'on a veu que quād mesmes nous aurions eu dessein de l'engager à ceste guerre à nos armes, il y auroit plus d'apparence, qu'il fist la paix sans nous, qu'avec nous, puis qu'il est beaufrere du Roy d'Espagne, & que ses enfās sont Princes du sang de ceste Monarchie, qui auront tousiours plus de sujet d'esperer leur accroissement, &

ce qui est deub à la grâdeur de leur exactiō es bō-  
 nes grâces du Roi d'Espagne, qu'en son indignatiō:  
 puis mesmes que le General de l'armée Espagnole  
 est obligé au Due, des premiers auancemens de sa  
 fortune. Ces deux Princes aussi estās alliez du Roy,  
 ç'a esté l'honneur de la France de procurer sa paix  
 entr'eux, plustost que de s'armer en faueur de l'un  
 contre l'autre, non seulement pour conseruer l'al-  
 liance de tous les deux ensemble, n'estant pas iuste  
 d'esloigner ny d'offencer mal à propos les alliez  
 de ceste Coronne: Mais aussi il l'a fallu ainsi faire  
 pour se conseruer la gloire que le feu Roy auoit  
 acquise, d'estre l'arbitre de la Chrestienté, de la-  
 quelle gloire vne prise d'armes precipitée contre  
 le Roy d'Espagne nous faisoit aucunement des-  
 cheoir; puis que par ce moyen ceste pleine & pro-  
 fonde paix, qui est auourd'huy entre les Princes  
 Chrestiens, si Monsieur de Sauoye le veut, couroit  
 grand hazard d'estre interrompuë & troublée pour  
 long temps. Que si ceux qui parlent de ces choses  
 à l'auenture, & sans peser les éuenemens, conside-  
 roient combien il est facile de commécer les guer-  
 res, & combien il est malaisé de les acheuer avec  
 hōneur & profit; s'il consideroiēt que nous auons  
 beaucoup de persōnes qui peuuēt mettre les trou-  
 bles en ce Royaume & dans la Chrestienté, mais  
 que nous en auōs fort peu, qui les en puissent oster,  
 & qui puissent sauuer vn grand Estat d'un embrä-  
 zement, & d'une combustion generale, sans doute  
 ils apprendroient à louer & benir le Conseil de  
 paix que la Roync a sagement & heureusement  
 suiuy durant son Gouvernement. Et apres tout, le  
 Roy a tousiours tesmoigné qu'il n'abandonneroit  
 iamais Monsieur de Sauoye, quand mesmes il au-



roit voulu cōtinuer à reietter la paix: car il l'porte trop à sō Estat de l'assister s'il estoit en dāgerement: mais il falloit auparauāt essayer tous les moiens doux, & paisibles qui sont plus agreables à Dieu, plus viles à la Chrestienté, & plus propres & plus necessaires, pour cet Estat, & pour celuy de Sauoye. C'est la seule cause pourquoy le Roi estat informé que plusieurs cōmissiōs de ce Prince, auoient esté distribuees dās les Prouinces de son Royaume, pour faire des leuees de gēs de guerre sans son sçeu, & contre ses deffences, son Conseil a fait publier l'Edit du quatriesme iour d'April, defendāt à toutes sortes de personnes de s'armer. Cōtre cet Edit, ce seditieux escriuain s'escrie, comme les brigands, & les perturbateurs de lapaix, ont accoustumé de crier contre les loix qui repriment leurs crimes, & est si esfonté, que d'ozer escrire, *Que ce sont inuentions de la faction d'Espagne, & que l'Edit a esté verifié par quatre ou cinq factieux, dans le Parlement à la desrobee, & que c'est vn Edit cōtraire au droit des gens, & à la liberté de la Noblesse, & milice Françoisse.* Par où il descouure son ignorance, & sa brutalité, & se fait plustost cognoistre vn rustre qui ne sçait que c'est des loix de l'Estat, qu'un Gentilhomme François, qui ne peut ignorer que c'est vn droit essentiel à la souueraineté, de pouuoir defendre, ou ordonner les leuees des gens de guerre. Ce mal-heureux aussi n'a peu blasphemer contre le Roy qui n'ait deschargé, ainsi il le continue par felonie, & l'acheue par des fureurs d'un Rodomont de Theatre, menaçant la Iustice de la pointe de son espee, sans regarder au Ciel, & sans recognoistre, que Dieu à la main armee pour defendre le Roy & sa Iustice, & que la France a assez de vigueur pour estouffer entre ses bras tous ceux qui voudront la plonger.

derechef dans l'abyfme des guerres Ciuiles. Laif-  
 fons là donc cest infame efcriuain, qui n'a pas dequoy  
 faire ce qu'il dit, & deplorons le mal-heur de nos con-  
 fusions, pour recognoiftre tant mieux l'obligation  
 que nous deuons à la fage conduitte de la Reyne, qui  
 les retient à ce qu'elle ne nous accable point. Chacun  
 a veu à l'œil, & touché de la main, que plusieurs tefmoi-  
 gnent la crainte qu'ils auoient de fon oppreffion, qui  
 neantmoins l'entretenoient en hûmeur, de ne vou-  
 loir point defarmer, qui luy promettoient leur affi-  
 ftance, qui feuls retardoient l'effet des bons cōfeils que  
 leurs Majeftez luy donnoient, & qui crioient d'un  
 cofté qu'on le vouloit perdre, & de l'autre l'enga-  
 geoient à fa ruine, par leurs mauuaifes pratiques. Et  
 toutesfois ç'a esté le bon-heur de la Chrestienté, la  
 gloire de ce Royaume, & le falut de ce Prince qu'au  
 mefme temps qu'on diffamoit le gouuernement, la  
 Reyne n'a pas laiffé de faire reluire l'autorité du Roy  
 dans l'Italie, tefmoignant d'une part qu'elle eftoit re-  
 foluë d'opposer au befoing les armes du roy, pour cō-  
 feruer fes alliez & neantmoins propofans à son Altes-  
 tefle de fi bons & falutaires confeils, qu'elle n'a donné  
 ordre ny reputation à fes affaires qu'en les fuiuant. Car  
 par leur moyen elle a embrassé paix que sa Majefté  
 luy a procurée, le Roy d'Efpagne s'en eftant remis à  
 sa conduitte: a signé les articles de la paix & mis ordre  
 à feparer font armee: & ainfi la Reyne par vne fageffe  
 accompagnée d'un bon-heur admirable, en mefme  
 temps a conserué la gloire que le feu Roy auoit acqui-  
 se, d'estre l'arbitre de la Chrestienté, a chassé la guerre  
 hors de l'Italie, a affermy la paix entre les Princes  
 Chrestiens, & a conserué parmy des volonte, & des  
 intereffs si contraires trois alliances tout à la fois:

celle de Mantouë, à laquelle la nature & le sang obligoient le Roy, celle de Sauoye à laquelle il estoit tenu pour le bien de l'Estat, & en suite des promesses du feu Roy, & celle d'Espagne, qu'il s'est nouuellement acquist par son mariage. Ceste grande & glorieuse Princesse a conserué la dignité du Roy & de l'Estat, a estouffé les semences de la guerre, dans la France, & dans l'Italie, a continué de sauuer les peuples par la paix, a remis les Alliez de ceste Couronne en repos, & a procuré leur seureté au milieu de leurs plus hazardeuses, & d'agereuses entreprises: & comme vn Astre de paix & de benediction elle a surmonté, & dissipé par les rayons de sa sagesse & de bonnairété, toutes les malignes influances dont le repos de la France, de l'Italie & presque de toute l'Europe estoit menacé. Que cela donc serue de loy, & d'exéple aux peuples, pour attendre paisiblement l'euenement & la fin des Conseils du Roy, sans les cōtrooller? & sans se plaindre, & pour detester la malice de ceux qui ont voulu sous le pretexte des affaires de Sauoye mettre tout ce Royaume en desordre, & auxquels aussi il n'a pas tenu, que par leurs procedures pleines, de rebellion, ils n'ayent precipité ce Prince en des Cōseils tres-pernicieux à son Estat. & à la Religio Catholique Grande Reyne, qui attirez les benedictions du Ciel, sur les affaires qui ont le bon-heur de vostre conduite, qui auez l'assistance meueilleuse de ses graces es affaires les plus difficiles & qui auez sauué, par vos paisibles Conseils, les Estats qui les ont receus: Voyez, comme publiquement toute l'Europe vous benit, & recognoist que la France, qui a esté obligée à la valeur incōparable du feu Roy, pour l'auoir tirée hors des guerres, qui l'auoient presque destruite, ne vous a pas auourd'huy vne moindre obligation, pour auoir



par la douceur, & moderation de vos Conseils, & par vostre debonnaire gouuernement, sceu empescher ne s'y soit ietee encor vne fois, avec vn plus grand malheur qu'elle n'auoit fait, puis que nous n'auons plus maintenant les yeux tournés sur aucun qui l'en peust retirer s'il estoit arriué, que reiettant le salut que vostre conduicte luy a donné, elle se fust precipitée dans les troubles. La gloire est la seule recompense digne des grandes actiōs, & des grāds Princes, tout le reste que les hommes peuuent donner, estant indigne d'estre offert à ceux qui donnent tout aux autres. Comme elle vous appartient tres-iustement, aussi l'avez vous toute entiere par le consentemēt des gens de bien, qui publieront à la postetiré, que toute la gloire qui vous est & sera cy apres rendue en ce monde. est encor de beaucoup au dessus des biens que vous avez faits à la France. Il reste maintenāt que tous les bons François veüillent ouurir les yeux, & voir par la suite de tous ces sanglans libelles, que le dessein de ceux qui les font & qui les approuuent, est de former vne faction dans l'Estat pour le remettre par ce moyen es horribles malheurs, desquels la memoire n'est pas encore passée. Car c'est pour cela qu'ils se prennent contre le gouuernement, le mespris duquel ils veulent imprimer dans l'esprit des peuples. C'est pour cela qu'ils deschirent l'innocence de la Reyne, par les plus horribles calomnies qu'ils peuuent inuenter, taschans d'attirer sur elle la haine des peuples, auxquels, à son preiudice, ils proposent leur detestables, inuentions. Ils voyent bien que durant le bas âge du Roy, elle est l'vnique appuy du gouuernement de l'Estat, & le fondement de tout nostre repos, & qu'elle est seule en France qui peut avec le consentement

de tous les grâds, & de tous les Ordres du Royaume, donner la conduite qui est necessaire aux affaires du public. Voyla pourquoy, afin de mettre tout en ruine, ils ne cessent de l'afli ger & renouellent tous les iours leurs persecutions, pour lasser sa patience, pour esloigner son affection des affaires, & pour rendre inutiles les penibles labeurs qu'elle employe pour conseruer cet Estat, & pour le garantir du naufrage, comme elle a fait durant sa Regence. C'est pour cela mesmes qu'ils diffament tous les Grands qui sont à la Cour, du conseil, & de la diligence desquels sa Maiesté est dignement assistee, & qui acquierent en la seruant vn lods immortel parmy tous les François, esgalans aux lauriers & aux triomphes des plus grands Capitaines, la gloire qu'ils acquierent par leur fidelité. C'est aussi avec le mesme dessein, qu'ils font semblant de prédre Monsieur le Chancelier à partie, afin de couvrir la haine implacable qu'ils ont conceuë contre la Reyne, sur laquelle en effect, ils s'efforcent de ietter tout le fardeau de leunie. Mais on n'a iamais veu que ceux qui ont esté esleués en ceste grande dignité, ayent euuë les morsures des ennieux & des factieux. Au demeurant, comme les puissances que les meschans hayssent le plus, sont les plus iustes ainsi par la haine que luy portent tous ceux qui aiment les esmotions, on peut iuger combien la conseruation est necessaire pour le bien de la paix. Cependant parmy toutes ces iniures atroces, que ceux-là proferent contre luy qui maudissent le Roy, il nous fait voir par la constance de ses actions, l'image viue de ce sage Romain, qui ne diminua iamais l'affection qu'il portoit au bien de son pays, encor qu'on le traictast fort indignement parmy le peuple, & qu'on le courrit d'in-

iures. Ayant comme il a, la paix pour sa principale fin, Dieu conuertira leurs maledictions en louanges: le temps qui est le souverain medecin des maladies de l'esprit, comme de celles du corps, fera voir mesme à ses enuieux & ennemis le nombre & la necessité de ses seruices, & la verité qui est la fille du temps, publiera à la posterité, qu'il n'a pas *nonobstant les bruits des meschans, desisté de servir au salut de l'Estat.* Quant aux autres ministres que leurs Majestez employent en la conduite de leurs affaires, ils ne sont non plus espargnez que luy. Car puis qu'ils appellent tout le gouuernement *une tyrannie & une faction*, & qu'ils preschent la rebellion & la desobeyssance, ils descouurent assez qu'ils n'aiment rien que le mal-heur de l'Estat. Par les maux donc que nous veulent procurer ces mauuais François, il nous est facile de iuger qu'est ce que nous deuons faire: Et c'est de continuer plus que iamais le respect que nous deuons au Roy & à la Reyne: De nous efforcer de publier nostre obeyssance & fidelité à leur seruice: De soustenir au prix de nostre vie l'auctorité du Roy cõtre toutes sortes de factions; & qu'il ny a point de plus grands maux dans les Estats que les diuisions, chacun doit ayder de tout son, pouuoir à l'vnion & concorde publique. En vñant ainsi nous verrons fleurir cet Estat plus qu'il n'a iamais fait, l'Eglise attirera sur nous par ses prieres, toutes sortes de benedictions du Ciel: La Nobesse s'opposera franchement à tous les rebelles: La Iustice prendra le glauiue à la main, avec plus de resolution que iamais, pour chastier les sedicieux, & le peuple tesmoignera tousiours, qu'il ne peut viure en seureté sous autre ombre que sous celle du Roy. En fin, puis que la licence d'escrire contre l'Estat, se rend effrenez tous les iours,



c'est à ceux qui Dieu a mis la Iustice en la main pour  
 punir les crimes, d'y pouruoir en telle sorte, que leurs  
 mespris ils ne se rendent point coupables deuant Dieu  
 & deuant les hommes, du mal qu'ils pourroient cy-a-  
 pres faire, si nostre malheur vouloit que ces semences  
 de sedition, qu'ils iettent dans les Prouinces, vins-  
 sent à desbaucher en quelques endroits les affectiōs des peu-  
 ples. Permettez-moy dōc, vous qui tenez le list de la  
 Iustice souueraine du Roy au milieu de vous comme  
 le gage que le Ciel vous a donné de la duree de ceste  
 Monarchie, qui portez peinte sur vos fronts la ven-  
 geance de Dieu à la confusion des rebelles, qui rendez  
 le Roy redoutable par la senere obseruation des loix,  
 & qui ne pouuez estre assis sur ces glorieuses marques  
 du sceptre François, sans auoir fait vœu à Dieu de ren-  
 dre inuiolablement à vn chacun ce qui luy appartient;  
 Permettez-moy, au nom de Dieu, qu'avec humilité  
 & les mains iointes, ie vous requiere au nom de tous  
 les bons François, qui conspirent avec vous la conser-  
 uation de cet estat, de vouloir commencer à vser de  
 vostre autorité, pour reprimer l'insolence de ces de-  
 testables libelles. Il est tēps qu'il vous plaise de rēdre à  
 Dieu l'hōneur qui luy est deu, par le chastimēt de ceux  
*qui blasphemēt contre luy, detractans des Puissances souuerai-  
 nes souueraines, qui ne regnent que par son commandement.*  
 Il est temps que vous rendiez au Roy la Iustice qui luy  
 est deuë, contre ceux qui dans la ville capitale de ce  
 Royaume & à vostre veuë, ozent si souuent deschiffrer  
 son autorité, l'honneur de la Reyne sa mere, le gou-  
 uernement de son Estat, les grands qui l'assistent, ses  
 principaux ministres, son Estat, les grands qui l'assistēt  
 les principaux ministres, son conseil, son mariage, ses  
 aliez, & qui sans aucune apprehension de chastiment,

ozent exciter les peuples à seditiō & felonie. Il est tēps qu'il vous plaise de rendre aux bons François, ce que vous leur devez, & qu'ils vous demandent affectueusement, vſant de quelque nouueau chastiement pour faire cesser cēspernicieux exemples, qui ſont des tristes preſages de quelque grand mal-heur. Vous eſtes ialoux de voſtre authorité, de l'honneur de vos charges, & ne voudriez pour rien endurer qu'on touchaſt à la gloire des dignitez que le Roy vous a dōnees, puis qu'elle ſert grandement au bien de la Juſtice, & à contenir les peuples en l'obſeruation des loix. Chacun regarde le ſoin que vous en auez, ſe promet on, que vous en ferez part en ceſte occurrēce, à leurs Maieſtez, qui ſont ſi malheureuſemēt aſſaillies, par ces plumes execrable, en voſtre preſencē, & de tout le Royanme, puis qu'il importe pour voſtre ſalut, & pour le ſalut de de tous, que l'authorité du Roy ſubſiſte, & que le Gouvernement de l'Eſtat qu'il approuue, ſoit Sainct, & inuolable. Et puis que vous puniſſez ſeuerement par l'ariſteur des loix, les calomnies qu'on a dreſſees contre les particuliers, chacun attend, & Dieu vous le commande par ſa loy, que vous n'eſpargnies point ces malheureux, qui *maudiſſent le Prince de ſon peuple.*

